

PROSPEKTUS: FLEDGLINGS

By Fledglings maak ons voorsiening vir 4 en 5-jariges in 'n vriendelike, stimulerende omgewing, waar hulle aangemoedig word om volgens hulle eie potensiaal, binne 'n bepaalde raamwerk, te ontwikkel en te presteer.

Noodsaaklike lewensvaardighede word ontwikkel deur middel van besprekings en geleenthede om te ontdek en te eksperimenteer. Ons verskaf deurlopende stimulasie vir die ontwikkeling van fyn- en groot motoriek, visuele- en ouditiwe persepsie en om fisiese en ruimtelike oriënteringsbewustheid vas te lê. Ons hou altyd in gedagte dat kreatiwiteit (die daad) belangriker is as die eindproduk. Ons werk van die bekende na die onbekende. Die leerders is elke dag betrokke by:

- 'n tema-bespreking;
- taal en wiskundige konsep ontwikkeling;
- 'n wye reeks kreatiewe aktiwiteite;
- musiek en beweging;
- konstruksie en verbeeldingspel;
- opvoedkundige speletjies en legkaarte;
- stories.

Die rol van spel is van kardinale belang vir kinders se sosiale interaksie sowel as fisiese ontwikkeling, daarom maak ons rooster ook daarvoor voorsiening. Die leerders gaan ten minste een keer per kwartaal op opvoedkundige uitstappies.

Deur die leerders aan te moedig om alles vir hulleself te doen, ontwikkel hulle 'n positiewe selfbeeld en is dit ons doel om onafhanklikheid, selfvertroue en selfstandigheid aan te moedig. Ons lê klem op sosiale vaardighede wat etiket, vriendskap, bedagsaamheid, empatie, mededeelsaamheid, hulpvaardigheid en regverdigheid insluit. Hierdie basiese vaardighede maak dit vir ons leerders moontlik om hul Graad R jaar ten volle te geniet.

Tydens skoolure, word verskeie opsionele buitemuurse aktiwiteite deur professionele persone aangebied, naamlik: Musiekverryking, "Playball", en "Click-a-Mouse".

Ons het twee keer per jaar fondsinsamelingsprojekte en 'n sang- en tee-oggend vir die Mamas en Oumas. Die hoogtepunt van die jaar is ons Kersspel laat in November.

Fledglings is die wegspringblokke vir die leerders se skoolloopbaan. Ons laat hulle die genot daarvan ervaar om kennis te verwerf en ons bied hulle 'n goeie fondament vir die toekoms.

Ons sien uit daarna om jou en jou kind in ons skool te verwelkom en om dit die begin van 'n gelukkige en produktiewe toekoms te maak.

Skool ure

Die amptelike skoolure is vanaf 08:00 - 12:15. Die hekke sal elke oggend om 07:45 geopen word om werkende ouers te akkomodeer. Let daarop dat die klaskamers tot en met hierdie tyd nie beskikbaar is nie. Die onderwyseresse is gewoonlik vroeër daar om hulle klasse vir die dag voor te berei. Hulle moet dit, sonder om deur opgewonde klein mensies onderbreek te word, of om beserings te versorg, te kan doen. Om die skoolroetine nie te verbreek nie, mag leerders nie later as 08:15 by die skool wees nie. Aangesien die klasse vir nasorg voorberei word, word daar versoek dat leerders stiptelik om 12:15 afgehaal word.

Fledglings volg dieselfde skoolkalender as die Laerskool Kenridge. Die skole heropen op Woensdag, 13 Januarie 2010. Gedurende die eerste twee weke is die skoolure korter, sodat ons nuwelinge die geleentheid kry om geleidelik by die skoolroetine aan te pas.

1 ^{ste} week	:	08:00 - 11:00 (13 Januarie - 15 Januarie)
2 ^{de} week	:	08:00 - 11:30 (18 Januarie - 22 Januarie)
3 ^{de} week & daaropvolgend	:	08:00 - 12:15 (25 Januarie - Desember)

Nasorg

Daar is 'n beperkte aantal plekke beskikbaar.

Kontak Lorna Rutter (☎ 021 976 4048) vir enige navrae asseblief.

Geldsake

U moet asseblief 'n nota in die boodskapsboekie maak wanneer u enige geld skool toe stuur. Die onderwyseresse sal ontvangs van gelde erken, deur die boodskapboekie te teken. Indien u 'n tjek stuur, maak dit asseblief **altyd** uit aan Laerskool Kenridge. Vir bak en brou sal u skoolrekening op 1 Maart en 1 Augustus met R60 gedebiteer word.

Parkering

Toegang tot Kenridge Fledglings word verkry vanuit die parkeerterrein wat vanaf Tygervalleiweg uitdraai. Maak asseblief seker dat ons hekke te alle tye agter jou toegemaak word. Geen voertuie word in die skoolgronde toegelaat nie.

Benodighede vir die 1^{ste} dag

- 'n Boodskapboekie word aan u verskaf met ons oriënteringsdag. Trek dit asseblief met mooi papier en kontak oor.
- 'n Regop plastiek of karton tas wat 'n A3-grootte papier met gemak kan vat. Junior tasse met die drie afskortings is ook geskik en is beskikbaar by Pick 'n Pay Hipermark (sakke en rugsakke is wel modieus, maar word nie toegelaat nie. Dit is ongemaklik om uit te pak en kosbare kunswerke word gewoonlik in die proses beskadig.
- Twee eenderse waslappe - maklik herkenbaar, duidelik gemerk en met 'n lang, sterk lus om dit aan op te hang.
- 'n Skoon stel klere. ('n Stel ou klere in 'n "zip-lock" tipe sak, duidelik gemerk, wat gedurende die jaar gestoor kan word vir noodgevalle.) Onthou om gebruikte klere weer te vervang asseblief.
- Gesonde kospakkies word aangemoedig, en onthou asseblief dat dit nie 'n ete is nie. Ons stel voor: bruinbrood, Marie- of Tenniskoekies, vars vrugte en groente, neute, kaas ens. Moet asseblief nie iets met 'n soet vulsel of versiering inpak nie. Mini-pakkies moet asseblief oopgemaak word. Vermoed asseblief alles wat kan mors, bv. joghurt drankies met doppies wat afgetrek moet word, gaskoeldrank of warmflesse.

Ander benodighede

- GEEN speelgoed mag skool toe gebring word nie. Stories wat inskakel by ons temas, is altyd welkom, so ook musiek of storie-kasette.
- "Kaalvoet is die beste!" Indien u kind wel skoene skool toe moet dra, moet dit sandale, plakkies of "Wellington"-waterskoene wees. Dit is 'n Fledglings reël dat die leerders dwarsdeur die jaar geen oprygskoene skool toe mag dra nie (kinders van hierdie ouderdomsgroep kan nog nie hul eie skoenveters vasmaak nie).
- Fledglings T-hemde en sweetpakbaadjies is by die skoolwinkel beskikbaar. Hierdie T-hemde moet elke Donderdag en na alle uitstappies gedra word. Die sweetpakke is die uniform vir uitstappies in die winter. Kontak gerus die skoolwinkel (021 976-3046) om meer oor pryse of beskikbaarheid uit te vind.
- "Wellington"-waterskoene (duidelik gemerk) is verpligtend gedurende nat en koue weer.

Ouer Inligtingsaand

Vroeg in die nuwe jaar, sal daar 'n vergadering gehou word. Hierdie vergadering is vir alle ouers en is die enigste formele vergadering van die jaar. Dit is dus noodsaaklik dat ten minste een van die ouers van elke kind die vergadering moet bywoon.

Ons sien daarna uit om julle weer in 2010 te sien. Kontak ons gerus indien julle enige navrae het.

